



Kanuni ya Upendo katika

Sheria

Sisi twapenda kwa maana yeye alitupenda sisi kwanza.—1 Yohana 4:19.

Hakuna uthibitisho wa toba ya kweli isipokuwa kama inafanya matengenezo. Ikiwa atarudisha rehani, na kutoa tena kile alichokuwa ameiba, kuungama dhambi zake, na kumpenda Mungu na wanadamu wenzake, mwenye dhambi anaweza kuwa na uhakika kwamba amepita kutoka kifo na kuingia uzimani.

Wakati, kama viumbe wenye dhambi, tunapokuja kwa Kristo na kuwa washirika wa neema Yake itoayo msamaha, upendo huchipuka moyoni. Kila mzigo unakuwa mwepesi, kwa kuwa nira anayoiweka Kristo ni rahisi. Wajibu unakuwa wa kufurahisha, na kujitolea huwa ni raha. Njia ambayo hapo awali ilionekana kufunikwa na giza, inakuwa angavu kwa miale kutoka kwenye Jua la Haki.

Uzuri wa tabia ya Yesu utaonekana kwa wafuasi Wake. Ilikuwa ni furaha Yake kufanya mapenzi ya Mungu. Kumpenda Mungu, bidii kwa ajili ya utukufu Wake, ndiyo ilikuwa nguvu inayotawala katika maisha ya Mwokozi wetu. Upendo ulipamba na kuinua matendo Yake yote. Upendo ni wa Mungu. Moyo usiowekwa wakfu hauwezi kuuanzisha au kuuzalisha. Unapatikana tu ndani ya moyo ambao Yesu anautawala. “Tunapenda, kwa maana Yeye alitupenda sisi kwanza” (1 Yohana 4:19). Katika moyo uliofanywa upya na neema ya Mungu, upendo unakuwa kanuni ya utendaji wake. Unabadilisha tabia, unatawala misukumo, unadhibiti hisia, unatiisha uadui, na kuinua moyo wa kupenda. Upendo huu, unapotunzwa ndani ya nafsi, hufanya maisha kuwa matamu na kueneza ushawishi unaotakasa pande zote.

Kuna makosa mawili ambayo dhidi yake wana wa Mungu—haswa wale ambao ndio tu wameiamini neema Yake—wanahitaji haswa kuyalinda. La kwanza ... ni lile la kutazama matendo yao wenyewe, wakiadini kila kitu wanachoweza kukifanya, ili kujileta katika mapatano na Mungu. Yeye ambaye anajaribu kuwa mtakatifu kwa matendo yake mwenyewe katika kuitunza sheria, anajaribu kitu kisichowezezekana. Kile ambacho mwanadamu anaweza kufanya bila Yesu kimechafuliwa na ubinafsi na dhambi. Ni neema ya Yesu pekee, kwa njia ya imani, ambayo inaweza kutufanya kuwa watakatifu.

Kosa la pili litupasalo sisi kuwa na hadhari nalo ni kinyume cha lile la kwanza, ndilo kufikiri kwamba hatuna haja kuishika sheria ya Mungu; kwa sababu kwa imani pekee tunakuwa washirika wa neema ya Kristo, matendo yetu hayahusiki katika ukombozi wetu.

Lakini zingatia hapa kwamba utii sio tendo la kukubali kwa nje tu, bali ni huduma ya upendo. Sheria ya Mungu ni udhihirisho wa asili Yake Mwenyewe; ni mfano halisi wa kanuni kuu ya upendo, na kwa hiyo ni msingi wa serikali Yake mbinguni na duniani. Ikiwa mioyo yetu itafanywa upya na kufanana na Mungu, ikiwa upendo wa Mungu umepandikizwa ndani ya nafsi, je, sheria ya Mungu haitatekelezwa maishani? Sheria ya upendo inapokuwa imepandikizwa moyoni, mwanadamu anapoumbwa upya katika sura Yake yeye aliyemuumba, ahadi ya agano jipya inatimilizwa.... Utii—huduma na utii wa upendo—ni ishara ya kweli ya uanafunzi (Jipatie Amani Moyoni, uk. 43–45).